



Llywodraeth Cymru  
Welsh Government

---

## **DATGANIAD YSGRIFENEDIG GAN LYWODRAETH CYMRU**

---

**TEITL** Rheoliadau Cludo Gwastraff Rhyngwladol (Diwygio) (Ymadael â'r UE) 2021 ("Rheoliadau 2021")

**DYDDIAD** 30 Rhagfyr 2020

**GAN** Rebecca Evans AS, Y Gweinidog Cyllid a'r Trefnydd

**OS a osodwyd yn Senedd y DU, sy'n diwygio is-ddeddfwriaeth mewn maes datganoledig**

**Rheoliadau Cludo Gwastraff Rhyngwladol (Diwygio) (Ymadael â'r UE) 2021 ("Rheoliadau 2021")**

Mae Rheoliadau 2021 yn diwygio'r ddeddfwriaeth a ganlyn:

### Deddfwriaeth yr UE

- Rheoliad (CE) rhif 1013/2006 Senedd Ewrop a'r Cyngor o 14 Mehefin 2006 ar gludo gwastraff ("Rheoliadau Cludo Gwastraff"); a
- Rheoliad y Comisiwn (CE) rhif 1418/2007 o 29 Tachwedd 2007 ynghylch allforio i adfer rhai o'r mathau o wastraff a restrir yn Atodiad III neu IIIA i'r Rheoliadau Gwastraff i wledydd penodol na ddônt o dan benderfyniad y Sefydliad ar gyfer Cydweithrediad a Datblygiad Economaidd ("OECD") ar reoli symudiadau gwastraff ar draws ffiniau.

### Is-ddeddfwriaeth ddomestig

- Rheoliadau Cludo Gwastraff ar draws Ffiniau 2007.

## **Unrhyw effaith y gall yr offeryn statudol ei chael ar gymhwysedd deddfwriaethol Senedd Cymru a/neu gymhwysedd gweithredol Gweinidogion Cymru**

Nid yw Rheoliadau 2021 yn effeithio ar gymhwysedd deddfwriaethol Senedd Cymru nac ar gymhwysedd gweithredol Gweinidogion Cymru.

Mae Rheoliadau 2021 yn diwygio cyfraith yr Undeb Ewropeaidd (yr UE) a deddfwriaeth ddomestig er mwyn gallu rhoi Protocol Iwerddon / Gogledd Iwerddon ("y Protocol") ar waith ac er mwyn gallu parhau i weithredu cyfraith yr UE a ddargedwir, ym maes diogelu'r amgylchedd mewn cysylltiad â symud gwastraff ar draws ffiniau, o dan Ddeddf yr Undeb Ewropeaidd (Ymadael) 2018 (y "Ddeddf Ymadael") yn dilyn ymadawriad y Deyrnas Unedig (y DU) â'r UE.

### **Diben y diwygiadau**

Diben Rheoliadau 2021 yw gwneud y cywiriadau angenrheidiol i'r ddeddfwriaeth a ddargedwir er mwyn medru rhoi mesurau ar waith ar gyfer rheoli symudiadau gwastraff o Brydain Fawr i Ogledd Iwerddon.

Mae Rheoliad Cludo Gwastraff yr UE yn darparu ar gyfer goruchwylio a rheoli llwythi gwastraff o fewn ei ffiniau a chyda gwledydd Cymdeithas Masnach Rydd Ewrop, y Sefydliad ar gyfer Cydweithrediad a Datblygiad Economaidd ("OECD") a gwledydd y tu allan i'r UE sydd wedi llofnodi Confensiwn Basel.

O dan Gonfensiwn Basel ar Reoli Symudiadau Gwastraff Peryglus ar Draws Ffiniau a'u Gwaredu, daw llwythi gwastraff o dan reolaeth i wneud yn siŵr eu bod yn cael eu trin mewn ffordd amgylcheddol ddiogel. Mae'r darpariaethau, ymhlith pethau eraill, yn rhwystro eu cludo i wledydd lle na ellir gwarantu y cânt eu trin mewn ffordd amgylcheddol ddiogel a threfn hysbysu ar gyfer symud gwastraff ar draws ffiniau.

Yn unol â thelerau'r Protocol, bydd Gogledd Iwerddon yn parhau i ddilyn Rheoliadau Cludo Gwastraff yr UE tra phery'r Protocol. Mae hynny'n golygu y bydd Prydain Fawr yn trin Gogledd Iwerddon fel pe bai'n aelod-wladwriaeth o'r UE o safbwynt symud gwastraff o Brydain Fawr i Ogledd Iwerddon.

Bydd y newidiadau gweithredol a'r diwygiadau canlyniadol eraill a wneir gan Reoliadau 2021 yn sefydlu mesurau rheoleiddio a rheoli gweinyddol ar symud gwastraff o Brydain Fawr i Ogledd Iwerddon sydd eu hangen i roi'r Protocol ar waith.

Caiff trefn reoli'r UE ar gyfer cludo gwastraff ei chadw yng nghyfraith y DU ar ôl y Cyfnod Pontio. Bydd y DU yn parhau'n llofnodwr o Gonfensiwn Basel ac yn aelod o'r OECD a bydd yn parhau i roi'r rheolau rhyngwladol a geir yn y cytundebau hyn ar waith.

Mae Rheoliadau 2020 a'u Memorandwm Esboniadol, sy'n gosod manylion tarddiad, diben ac effaith y diwygiadau, ar gael yma:

<https://www.legislation.gov.uk/ukdsi/2021/9780348217650>

### **Pam y cafodd cydsyniad ei roi**

Mae cydsyniad wedi'i roi i Lywodraeth y DU wneud y cywiriadau hyn mewn cysylltiad â Chymru ac ar ei rhan er sicrhau effeithlonrwydd a hwylustod ac oherwydd natur dechnegol y diwygiadau. Barnwyd nad yw'r diwygiadau'n newid polisi ar ôl ystyried yn llawn a gofalus y diwygiadau, yr asesiad o gyfarwyddiadau'r polisi a'r dadansoddiad cyfreithiol o'r gwaith drafftio. Bydd y diwygiadau hyn yn sicrhau bod y llyfr statud yn parhau'n ymarferol ar ddiwedd y Cyfnod Gweithredu.